

欽  
定  
全  
唐  
文

欽定全唐文卷二百二十一目錄

新文藝出版社藏書

張說一

奉和聖製喜雨賦

進白鳥賦

虛室賦

江上愁心賦寄趙子

畏途賦

聖德頌

皇帝在潞州祥瑞頌十九首奉勅撰

起義堂頌

上黨舊宮述聖頌

并序

大唐封祀壇頌

欽定全唐文卷二百二十一

張說一

說字道濟又字說之其先范陽人徙家河南之洛陽弱冠  
應詔舉對策乙第授太子校書中宗朝歷工部兵部侍郎  
加宏文館學士睿宗景雲二年同中書門下平章事轉尚  
書左丞罷知政事徵拜中書令出爲相州刺史開元九年  
拜兵部尚書同中書門下三品爲朔方軍節度大使十三  
年授集賢院學士知院事將東封授右丞相兼中書令致  
仕在家修史十七年復拜尚書左丞相加開府儀同三司

十八年卒年六十四追贈太師諡曰文貞

奉和聖製喜雨賦

愚臣啟先王之冊府校絕瑞於祥經樂雲雨之平施齊品  
物之流形帝王爭重而爲寶麟鳳自輕而讓靈況愆時而  
渴望欵意達而神聽是月也朱明漸半紫榴未吐恐降災  
兮此下人罄虔祈兮我仁主退象龍之禮禱斥持鷺之貌  
舞屏翳慙其廢職祝融悔其遷怒山決潏而出雲天霧霓  
而下雨速一言而感應剋三日而周溥氣滃靄以駢黠聲  
颯灑以蕭條灌如雲漢之屑落散似珠泉之散澆街塵漫

其潢潦臯壤萋其綠苗舒四溟之清潤卷六合之煩囂咸  
澡骨於神液共歡心於聖朝借如五月有梅雨之名三春  
有穀雨之氣越人以泥牛代沃胡土以賣龍求費出員嶠  
而石香入成都而酒味彼偏方與小節非大人之所貴復  
有送山祇於鬱島迎海后於葛川疾雷碎其山裂走電烜  
其海然天子作愁霖之賦詞人綴苦雨之篇牆屋壞於倒  
井黍稷沈於下田乃凶禋之不令曷休徵之有焉請言瑞  
雨之可喜也協氣交泰嘉生是賴湛覃而不溺衍溢而無  
害東漸出日之表西被無雷之外南窮火鼠之譯北盡燭

龍之會天文則雲漢昭回天澤則江河霽霽雖欲談天而  
窺管孰知堯德之爲大

進白鳥賦

咨大鈞之播氣在品物而流形有莫黑之凡族亦變白而  
效靈感上仁於孝道合中瑞於祥經若夫事出神妙理包  
舒卷貺集王屋飛隨帝輦捧日高翥迎風細轉識句句於  
招呼每啞啞於啄吮以其雪羽霜毛冰精玉狀拔奇綠林  
之下賞異紫臺之上瞰鵷鵠之紗窗抱鳳凰之衣桁恐同  
類之見嫉畏不才之速謗期委命於渥恩豈願思於閑放

惟聖君之靈囿物何遠而不臻有能言而可重或善舞而  
取珍羞陋軀而入獻與寶羽而爲鄰采朝噪之聲樂眷夜  
啼之曲新無芒距以耀武不鈎觜以懷仁謝先容而特達  
却假飾以全真鑒深心於反哺終報德於君親

### 虛室賦

明月窗前古樹檐邊無北堂之樽酒絕南鄰之管絃理涉  
虛趣心階靜緣室惟生白人則思元厭百慮之勞止歸一  
途之兀然嗟乎巧智首亂禮樂增矯名起異端利成貪兆  
役二見之交戰驅五神而雜擾形何費而不衰性何煩而



不夭每竭源而追末必亡多而獲少玉帳瓊宮圖奢務豐  
朱門金穴恃滿矜隆榮與辱而俱盛事隨憂而不窮陷營  
爲之桎梏留健羨之池籠心元是幻法本皆空莫不因無  
證實假異生同魚何知而樂水蛇何意而憐風大哉默識  
守此元通顧瞻天下還如夢中

江上愁心賦寄趙子

江上之峻山兮鬱崎嶇而不極雲爲峯兮煙爲色歟變態  
兮心不識江上之深林兮杳冥濛而不已鳥爲花兮猿爲  
子紛盪瀆兮言莫擬夏雲陰兮若山秋水平兮若天冬沙

飛兮淅淅春草靡兮芊芊感四節之默運知萬化之潛遷  
伴衆鳥兮寒渚望孤帆兮日邊雖欲貫愁腸於巧筆紡離  
夢於哀絃是心也非模放之所逮將有言兮是然將無言  
兮是然

畏途賦

青泥路白馬關雲足躡霞手攀忠臣往兮孝子還陟羊腸  
臨鳥道搏絕岸援蔓草懸梁變娜以樹接虛閣穹崇而烟  
抱風雨擲汨兮崩泉而險湍圖畫詭屈兮紅峯而碧巒林  
黝黝而人靜山蓼蓼而地寒客有夢兮在城闕背芳萱兮

心不歇憫秋草之墜露弔窮崖之飛月聞哀猿之一鳴憂  
人宿昔今生白髮

聖德頌

太古厥初遺文闕矣書祖二典聿陳五教唐虞之訓歷代  
宗焉孰同理而不休奚同亂而克遘皇唐之興也道積四  
聖時將百年澤浸生人自根流葉孝和晏駕嗣子幼沖凶  
臣嬖女蹙弱王室人甚崩角之危朝深綴旒之歎賴天獎  
忠勇大戮鯨鯢尊文廟而安神清帝宮而待聖少主奉天  
命以至禪皇上拒天命以固違羣公卿士胥進曰陛下孝

弟之至歷數在躬處儲闡有讓元子之德居藩邸有辭太弟之高六合欣戴三靈允協爲天下君其誰與讓皇帝義不得已曰吁所憂之長也乃被帝服陟元后延羣臣見兆人是日也景雲至茲歲也戎狄來其尤祥極瑞雜沓異類蓋翫狎而不記矣上方謹庶務覽衆則履乾乾懷翼翼游道德之靈囿從鸞鷟之珍羣視天下之所不見聽天下之所不聞帝典皇綱於斯備矣宜定郊報之禮革封禪之則荅神貺揚元德不然者則二宗無類帝之壇五岳無省方之館矣若夫湯頌傳於考父文什著於周公臣子之志不

可闕也敢作頌曰

天祚聖唐啟我明主大哉皇帝與天同矩天乎蓋之地乎  
載之陽和化育懷生賴之孝乎惟孝告成於天靈壇神岳  
思皇嘏焉皇哉皇哉胡可捨旃大君受命景雲來翔流天  
汎日爛漫成章稽諸瑞典昔祚軒皇而今表聖土德以昌  
西戎遠國畏君之靈古稱卽序今乃來庭帝女是降其從  
如星天人偃革以迄太寧北胡狙獷狃於征伐帝初歷試  
護彼窮髮懷我好音稽顙天闕遐哉大同天子之功

皇帝在潞州祥瑞頌十九首奉勅撰

日抱戴

皇帝初臨潞州景龍元年四月二十有七日其日日抱戴  
頌曰

日告帝符王起乘土重光五色四方之主或抱或戴氣華  
暉嫵大明經天豈忘忠輔

月重輪

皇帝臨潞州景龍元年七月十有四日夜月重輪頌曰  
維帝潛德受天眷命月之重輪示我金鏡璧彩內澈環規  
外映君心用明神道協慶

赤龍

皇帝臨潞州景龍二年四月二十五日廳事據案假寐百  
姓白鶴觀道士宋大辯等三十餘人同見赤龍在案頌曰  
聖寐無體神融氣渙蜿然赤龍垂首據案昔有王媪預覩  
興漢今此潞人亦兆靈觀

逐鹿

皇帝景龍二年二月二十有八日巡屬縣至潞河有鹿奔  
走渡河水深三丈帝馳鞭逐鹿水不及馬韉應時獲鹿司  
戶叅軍崔弼隨帝而涉纔入數步馬溺焉頌曰

王者之畋必有天佐逐鹿深水乘蹕而過不失其馳舍矢如破後騎沒溺乃驗靈迹

嘉禾

皇帝臨潞州景龍二年八月二十有五日常子縣界內有嘉禾合穗頌曰

靈氣滋液嘉禾族生或分九穗有合雙莖昔効唐叔歸功太平今於歷試抽此德萌

黃龍

皇帝臨潞州景龍二年九月五日黃龍見於州城東五里



伏牛山南岡遲留久之觀者如堵頌曰

黃龍土精五方之長在田而見文明厥象軒圖瑞來夏匱  
妖往惟德可應恃神難調

羊頭山北童謠

皇帝臨潞州景龍二年九月已後嘗有童謠云羊頭山北  
作朝堂其州南六十里有羊頭山頌曰

熒惑降精是爲天使會合齟齬謳謠街市通賢妙識採斷  
來事山北朝堂此明天位

仙洞

皇帝臨潞州襄垣縣北有仙洞忽然自開十數里仙乳靈液凝膏注玉頌曰

憑乘仙穴應吳建號襄垣洞開神亦我報玉膏滴瀝石巷幽奧天將佑之陰靈啟道

### 大王山三壘

上黨記禹治水而登此山因名焉魏書云望氣者言其山有天子氣故太武壘石爲三封欲以厭之頌曰

昔望茲山當出天子太武心忌壓以軍壘地氣雖廢河清有俟三百餘年聖人方起

疑山鑿斷

上黨記後魏太和末孝文帝自代幸洛見此山有伏龍疑而不進遂斷山東麓以厭之其斷處猶存因名疑山頌曰王命必有厭勝多無不徵綠錯虛役丹徒舊山伏氣今聖靈符魏雖穿鑿能違天乎

赤鯉

皇帝景龍三年三月巡屬縣至襄垣南漳水上有赤鯉魚騰躍頌曰

龍或魚服鯉同國姓躍泉將飛告我天命麟昭武德翼贊

興慶昔去隨仙今來迓聖

黃龍再見

皇帝臨潞州景龍三年六月十五日黃龍再見於伏牛山  
頌曰

蜿蜿黃龍旣見將躍氣動雲繞精流電鑠文明剛健嫵媚  
纖弱萬物覩焉聖人其作

紫雲

皇帝臨潞州景龍三年九月九日與羣臣壺口山界坐其  
時東北有紫雲翩翩而來光彩照日明日上黨縣丞王敬

賓等白刺史劉懷一并啟皇帝請上狀奉教不許頌曰  
天臨壺口露座山眉紫雲來覆如蓋如帷畢景不滅含風  
自持一人有慶兆人賴之

李樹

皇帝臨潞州延唐寺有李樹連理皇帝親如驗見今御書  
額焉頌曰

李興帝族寺榜延唐異枝同幹雙名合祥花轉瑤萼子綴  
珠光本支百代永永蕃昌

神著

皇帝臨潞州景龍三年九月十有五日照百姓韓擬禮著筮卦未成而一著翹立擬禮曰此天人之瑞洎帝踐祚授擬禮遊擊將軍長上折衝頌曰

纖纖靈著下有伏龜天生神物以決狐疑一著特起自天立之無卦之卦告帝之期

### 金橋

金橋在潞南二里常有童謠云聖人執節度金橋皇帝景龍三年十月二十有五由此橋朝京師頌曰

出郡二里橫路金橋聖人南渡駟馬西朝運及誅呂時當

煥堯却尋後事一合童謠

紫氣

皇帝臨潞州景龍三年十月二十有五日常還京後州內所居寢堂上有紫氣七日不散頌曰

王往京國傾城戀惋紫氣浮空七日不散斐亶牕戶輪囷臺觀都人係心瞻仰雲漢

大人跡

皇帝從臨潞州還京後其宅內及州街並有大人跡長二尺五寸自東而西布武相繼頌曰

百神從王一舉西適衆觀空廡連步雲跡躡似郊媒痕同  
雷澤曠古奇事存乎帝籍

神人傳慶

皇帝唐隆元年六月二十日夜除妖孽後其明日州佐吏  
索崇嗣于州南門外聞空中有人云臨淄王誅韋氏相王  
得天下其崇嗣告長史裴思裴思以妖惑罪之禁錮累日  
逢其月二十一日赦到獲免案牘猶存頌曰

天帝下席承韋干命王赫斯興撥亂反正擊凶尊主一麾  
大定神人相歡肸蠁傳慶



起義堂頌

皇矣上帝臨下有赫降監四海求人之瘼吁彼隋煬其政  
不獲眷我高祖此惟其宅天輔臯陶明刑弼教道尊老氏  
同元體妙仁表四乳明融獨照隨父託心史良辯貌高祖  
誕靈神光夜耀天妹作合日兄夢紹祚生文帝膺運會昌  
首唱高祖騫飛晉陽萬夫一心元戎啟行火旗炎炎雲鳥  
洋洋五星迓帝萬國謳唐天網恢疎王師節制威惟連戮  
老生摧斃山祇引軍河龍渡帝渭倉散積離宮弛閉關輔  
來蘇遠方咸惠長安宮室上法太微隋遷寶鼎唐在璿璣

仗入雙闕詔出九圍三靈協載百祿同歸帝謂太宗表正  
封略濤蕩颺掃霆馳電鑠劔不摧鋒弩無再曠西平汧隴  
東取河洛杲密德充頭懸面縛北走獯鬻南達蠻荆遼碣  
作人梁岐底平風動神行海隅蒼生莫不來庭於昭義堂  
誓衆資始天命所起于胥頌美維予小子夙夜敬止於戲  
皇王緒思不忘

上黨舊宮述聖頌

并序

惟開元十有一祀正月皇帝展義於河東挾右太行留宴  
上黨整兵耀武入於太原設都建頌以崇王業南轅汾睢

祈穀后土天清日朗神歆如荅三月庚午飲至長安六軍  
解嚴四方和會邇觀法象遐詠德澤大虞巡之典修美漢  
祠之禮舉人心翕而一變神物效而無方於是邠王臣守  
禮寧王臣憲申王臣撫岐王臣範薛王臣業獻書於內開  
府儀同三司臣璟尚書臣駿臣象先臣頌御史大夫臣灌  
抗疏於外僉曰陛下受天厯數稽聖典謨道貫三靈仁育  
萬類掃陰沴而覩日開闢之功也尊文考而御天帝王之  
孝也天以陛下爲子人奉陛下爲君萬殊之福斯應畢臻  
三代之風頌聲咸作今潞人懷代邸詠泗亭採聖崖延元

石將表潛龍之館勒啟聖之圖勤亦至矣陛下推而不報其何以下塞衆望上對神庥哉臣聞天之所啟人之所戴必憑睿聖元懿之德元命貞符之紀功業見乎變德施加乎時德厚者施溥功元者應速或階晦以彰或由難而昌蓋生其德之謂天授其時之謂命天有成命其可沒乎陛下昔居是州也紫雲在天神光照室白鹿來擾黃龍上昇隴出仙洞而神魚躍山開禪穴而靈鐘韻謠言合讖巨迹引途嘉李傍連神著自起當此時也金石豫變獄頌先歸政殷六府人重五教陶無窳器漁有讓泉神而化之人不

知力昔龍負圖而大舜登狼銜鉤而后殷昌元圭錫於夏  
禹赤伏歸於漢光應運協符希代稱寶未有窮祥極瑞俶  
儻瓌異如今之至者矣若元貺集而不彰則神心不悅鴻  
業成而不贊則祝告無聞是掩天庥而蓋聖德也臣子之  
罪將何解焉願聽潞人以揚丕烈帝曰往者中宗違代國  
步維艱天祚我唐大命集於睿宗大聖真皇帝朕畏天將  
命不敢怠遑其乾符坤珍皆先聖之餘福朕何力之有焉  
然重違昆弟公卿之請抑心敬從無爲虛美重朕不德也  
羣臣游聖蕩莫能名約乎舊史敢頌成績辭曰

帝德廣運乃聖乃神天祚聖兮唐雖舊邦其命維新再受  
命兮帝初正人降居上黨天下往兮黃龍晝見攀天而上  
九五象兮帝適於野紫雲之下求必在今帝寢於堂變龍  
有光觀者駭兮天迹星謠木連蓍立總神異兮靈鐘化穴  
縞鹿赤魚何詭異兮上天無聲託類附形覺悟人兮聖皇  
齋栗在得戒失昭事神兮皤皤潞老樂我王道愛舊宮兮  
赫赫頌功與天比崇攄無窮兮

大唐封祀壇頌

皇帝六葉開元神武皇帝再受命致太平乃封岱宗禪社

首鑿石紀號天文煥發儒臣志美立碣祠壇曰厥初生人  
俶有君臣其道茫昧其風朴略因時而歟起與運而紛落  
泯泯沒沒無聞焉爾後代聖人取法象立名位衣裳以等  
之甲兵以怛之於是禮樂出而書記存焉反其源致敬乎  
天地報其本致美乎鬼神則封禪者帝王受天命告成功  
之爲也閱曩聖之奧訓考列辟之通術疇若天而不成曷  
背道而靡失由此推之封禪之義有三帝王之略有七七  
者何傳不云乎道德仁義禮智信乎順之稱聖哲逆之號  
狂悖三者何一位當五行圖籙之序二時會四海昇平之

運三德具欽明文思之美是謂與天合符名不死矣有一  
不足而云封禪人且未許其如天何言舊史者君莫道於  
陶唐虞舜臣莫德於皐陶稷禹三臣備德皆有天下仲尼  
敘帝王之書繫魯秦之誓明魯祀周公用王禮秦承伯益  
接周統孔聖微旨不其效與然秦定天下之功高享天祿  
之日淺天而未忘庭堅之德也故大命復集於皇家天之  
贊唐不惟舊矣其興之也元靈啟迪黃祇顧懷應歸運以  
義舉撫來蘇以利見濩也無放夏之慚武也無伐殷之戰  
高祖創業四宗重光有德格天漏泉蒸雲濡露菌蠢滋育



氤氲涵煦若天地之覆載日月之照臨溥有形而希景罄  
無外而宅心百有八年於茲矣皇帝攘內難而啟新命戴  
睿宗而纘舊服宇宙更闢朝廷始位蓋羲軒氏之造皇圖  
也九族敦敘百姓昭明萬邦咸和黎人於變立土圭以步  
厯革銅渾以正天蓋唐虞氏之張帝道也天地四時六官  
著禮井田三壤五圻成賦廣九廟以尊祖定六律以和神  
蓋三代之設王制也武緯之文經之聖謦之神化之然猶  
戰戰兢兢日慎一日納規誨以進德遂忠良以代工講習  
乎無爲之書討論乎集賢之殿寵勇爵貴經明翼乎鵷鸞

之列在庭毅乎貔貅之師居鄙人和旁感神寶沓至乾符  
坤珍千品萬類超圖溢牒未始聞記我后以人瑞爲心不  
以物瑞爲意王公卿士儼然進曰休哉陛下孝至於天政  
合乎道前年祈后土人獲大穰閒歲祀圓丘日不奄朔感  
祥以祈聖因事以觀天天人交合其則不遠意者喬岳掃  
路望翠華之來上帝儲恩俟蒼璧之禮久矣焉可專讓而  
廢舊勛羣臣固言勤帝知罪至於再至於三帝乃挹之曰  
欽崇天道俯率嘉話恐德不類敢憚於勤其撰巡狩之儀  
求封禪之故旣而禮官不戒而備軍政不謀而輯天姥練

日雨師灑道六甲按隊八陣警蹕孟冬仲旬乘輿乃出千  
旗雲引萬戟林行霍濩燐爛飛焰揚精原野爲之震動草  
木爲之風生歷郡縣省謠俗問百年舉百祀興墜典葺闕  
政攸徂之人室家相慶萬方縱觀千里如堵城邑連歡邱  
陵聚舞其中垂白之老樂過以泣不圖蒿里之魂復見乾  
封之事堯雲往舜日還神華靈鬱爛漫乎穹壤之間是月  
來至於岱宗祇祓齋宮滌濯靜室凝神元覽將款太乙議  
夫泰山者聖帝受天官之宮天孫總人靈之府自昔立國  
莫知萬數克外中而建號惟七十而有五我高宗六之而

今七矣非夫尊位盛時明德曠代遼濶難并之甚哉先時  
將臻夫大封也累封疆於高岡築泰壇於陽趾夫其天壇  
三襲辰陞十二咸秩衆靈列坐有次崇牙樹羽管磬鏞鼓  
宮懸於重墼之內千戚釁父鉤戟戣戣周位於四門之外  
伐國重器傳代絕瑞旅之於中庭玉輦金轂翠冒黃屋夾  
之於端路庶官百辟羌夷蠻貊褒成之後讓王之客序立  
於禮神之場旄頭弩牙鐵馬金鍔介冑如雪旗幟如火遠  
匝於清禁之野於是乎以天正上元法駕徐進屯千乘於  
平路留羣臣於谷口皇帝御六龍陟萬仞獨與一二元老

執事之人出天門臨日觀次沆瀣宿巉巖赤霄可接白雲  
在下庚寅祀高祖於上封以配上帝命衆官於下位以享  
衆神皇帝冕裘登壇奠獻俯僂叶金奏侑羽舞撞黃鐘歌  
大呂開闔闔與天語清將信公奉斗布度懋建皇極勤恤  
蒼生昭假乎未兆禳災乎未萌上下傳節而禮成樂遍福  
壽同歸而帝賜神策乃檢玉牒於中頂揚柴燎於高天庶  
忠誠之上達若憑焰而駕煙日轡方旋神心餘眷五色雲  
起拂馬以隨人萬歲山呼從天而至地越翼日尊睿宗侑  
地祇而禮社首遂張大樂觀東后國風惟舊無黜幽削爵

之誅王澤惟新有眚災大賚之慶不浹日至化洽於人心  
不崇朝景福遍於天下然後藏金匱於祔室迴玉鬻於上  
都煌煌乎真聖朝之能事而高代之盛節者也於斯之時  
華戎殊俗異音同歎曰兵合多兩山峻多雲豈有大舉百  
萬之師剋期千里之外及行事之日則天無點翳地無纖  
塵嚴冬變爲韶熹寒谷鬱爲和氣非至德其孰能動天如  
此其順者乎昔人云自西自東自南自北無思不服今信  
知聖人作而萬物覩其心服之之謂矣或曰祭泰折主先  
后非禮與曰是禮也非宜也王者父事天母事地侑神崇

孝無嫌可也且夫柴瘞外事帝王主之烝嘗內事后妃助之是開元正人倫革弊禮起百王之法也故令千載職末光聆絕韻咀甘實漱芳潤爍元妙之至精流不已之淑聲臣說作頌告於神明四皇墳而六帝典雖吉甫亦莫能名徒採彼輿人之詩曰大矣哉維天爲大惟皇則之率我萬國受天之祺子孫百代人神共保綏之云爾而已矣

欽定全唐文卷二百二十二目錄

張說二

開元正厯握乾符頌

龍門西龕蘇合宮等身觀世音菩薩像頌

荅宰臣賀破賊制

試洛州進士策問四道

兵部試將門子弟策問三道

兵部試沈謀祕筭舉人策問三道

諫內宴至夜表



并州論邊事表

爲留守奏慶山醴泉表

爲留守奏瑞禾杏表

爲留守作賀崛山表

爲留守奏羊乳麋表

爲留守奏嘉禾表

爲清邊道大總管建安王奏失利表

讓起復黃門侍郎第一表

第二表

第三表

讓兵部尚書平章事表

讓中書侍郎表

讓右丞相表

第二表

讓平章事表

讓中書令表

欽定全唐文卷二百二十二

張說二

開元正厯握乾符頌

客有嘲臣曰聖主正新厯握乾符百寮賡歌以美時六合  
鼓舞以頌德先生獨晏默書閣含翰詞林奚其爲儻擬也  
臣應之曰斗水不能評巨壑之量隙光未足議大明之體  
何者見福而守隘也握乾符者不謂執天命歟執天命者  
非夫廣德休厯交相表裏況命者夫子之所罕言也焉可  
偏贊而總握符之盛哉如作者略大本舉小節不亦仲尼

之門所聽營也是以涸思乾慮久難其述客無異焉客曰  
請終餘論粵若我大唐慶始白雲道昇紫氣屬漢東失馭  
淮南不返高祖舉晉陽之甲戡定關西太宗因倭后之師  
削平天下高宗收圖海外檢玉封中九域黎人重代飲澤  
雖鳴鸞改號神龍中興周鼎歸唐元主祀夏中宗違代嬖  
孽窺國於是乎聖上起藩邸入鈎陳一麾水心羣凶泥首  
崇復大聖越踐少陽受禪當宇而光大前烈垂統拜璧而  
慎寧後嗣四海有覆盂之安百代無委裘之隙是之謂聖  
人握符之大寶也四星入輔五將出禦倚禮樂爲國計仗

仁義爲軍勢英賢集殿而文教成千戚舞階而武功振敬  
讓光於九族孝慈行於萬宇磧嶂西南渤瀚東北織皮火  
毳喝炎山汜熱海向風來王黑貂駿浮天溟絕冰漠連  
歲獻款鳥獸無猜人之意草木無不達之氣升中於天比  
天同貴是之謂聖人握符之大政也歷試上黨黃龍飛天  
入清中禁白虹指日瘞汾隄寶鼎見柴岱宗卿雲蔚非應  
事而呈瑞者雖多狎而不紀矣是之謂聖人握符之大祥  
也以數推氣以氣定朔以星殷時以閏成歲考星閒而革  
疏度置歲差而辨誤日立大衍之紀參大渾之晷合鐘律

之聲極鬼神之情是之謂聖人握符之大厯也若夫仁聖  
根於內菁華發於外祥兆祕於前謠讖灼於後自然之理  
也彼洛下閎者漢太初時一巧厯耳云後八百歲當差一  
日有聖人正之斯人也抑將露才揚術預證來聖有耆舊  
之傳記無史策之明文然至隋之開皇及麟德聖厯三家  
創法一引爲徵約之年代則鄰近稽之圖籙則曖昧未有  
如新厯之昭昭者矣在昔唐虞之際以斗精受命者七人  
得四均閒氣而生者又二十八人所謂三十五際者也禹  
以金德王故夏后之有天下也生數四百年契以水德王

故殷人之有天下也成數六百年稷以木德王故周人之有天下也成數八百年伯益之命中天而堯族以火德乘之故漢室之有天下也生數再及二百年其間距王而興不能復大禹九州之跡及勝殘百年之命者皆五神之餘氣也咎繇降德皇唐復興土精應王厚德載物生數五百成數千年命厯有歸此其大較修德增祚與天無窮轉算之徒莫能究也緯以入元三百四歲爲德運七百六十歲爲代軌千五百二十歲爲天地出符四千五百六十歲爲七精返初天人相應合若符節自堯典命羲和修重黎之

舊理顓頊之歷上元甲子千五百餘歲得孔聖而春秋之  
歷序暨開元十二年甲子凡三千四十歲遇聖上而大衍  
之歷興是時也土德入生數之元天命當出符之會信矣  
伏惟聖上聰明文思道德之具也豁達大度皇帝之體也  
藝總六經漢光之學也文通三變魏祖之才也緣情定制  
五禮之本也洞音度曲六樂之宗也神於弧矢黃軒之威  
也聖於翰墨蒼頡之妙也兄弟善友王季之心也子孫衆  
多周文之福也大寶以定天位大政以布廣德大祥以合  
靈符大歷以啟成命德位兼才臨照如此符命介福粲章



如彼所謂廣德休厯交相表裏之效也善厯者必推來運以自神興王者不俟律言以表聖設徵夫洛下閎之語也其不有容成之事乎且如恃有命比於日孰是夏王之福也賴卜年衰其德豈謂周公之訓也故曰王者執天命在於俟天符致天符在於順天德布天德在於保天位四者備矣然後陳其盛德告於神明舍此道也胡可語正天厯握乾符哉謏臣懵學謝生元造樂虞典之歌舜羨周詩之美文敢不敷信詞薦清樂厭上客之誚託衆篇之後云爾維皇六葉於赫啟聖步玉斗握金鏡地維續天柱正山川

授方雷雨施令清廟九祐堯門百慶郊稷尊祖擇昌定命  
德自我流藝從我修龜易八卦龍書九疇文含玉律字吐  
金鈎鳴絲鶴舞調箭猿愁集賢榜殿花萼名樓神用外表  
事行先兆萬目朝徹千心暗曉卿雲爛漫黃龍窈窕游姑  
射神人宵登太山天下小飛祥走瑞均靈躋類鞮譯窮天  
琛維盡地爍此金戟鑄爲農器匪直也然探元索祕軸止  
輪運辰居星轉得一神凝吹萬情辨發斂潛合晦明幽闡  
階莫朝開宮槐夜卷正我長厯同符大衍天地清焉日月  
貞焉四時行焉萬物生焉窮神知化美功成焉金版玉牒

遠頌聲焉

龍門西龕蘇合宮等身觀世音菩薩像頌

我聞上古有聖人心入羣有身包大空普觀察一切音聲  
其名曰觀音菩薩日月有盡光明無際天地有終神通不  
減禮其形像隨緣而成功稱其名號因時而獲果龍門西  
龕等身像者此都人士思賢令蘇君之所造也天下之大  
都有五而河洛總其中皇居之赤縣有二而合宮是其一  
四隩輻湊萬商龐穆政頗財黠刑放寵怙所由然舊矣故  
強毅臨之則攢斂焱擾競虐不辜以扶扑睚眦是稱辯吏

寬厚處之則乾沒淫詭相詐莫禦以息偃簡怠謂之風流  
其傷弊一也武功蘇君名頴字廷碩隋右僕射邳國公之  
元孫今吏部尚書懷遠公之元子相門華列儒庭善訓雍  
容文雅當代知名通才博藝於何不可御史天憲也抗執  
簡之雄郎官星象也高握蘭之選帝車西幸皇眷東遙四  
方之極一臺歸妙蘇君於是乎始爲政於京邑籍田戶以  
行賦徹考資畜以程力任董逋逃以業浮庾詰姦慝以豫  
熒釐制事典以示好惡敦術學以興禮義省法罪獄吏無  
作威煦郵驛圉人不敗產加以躬親足以勵勤謀始足以

作則端莊足以易暴清儉足以息貪夫如是簡往而事行  
正身而人慕輕薄束修而歸厚流亡襁負而來復曾未期  
月遷給事中旣而人吏父老聚而謀曰咨休哉明府之惠  
人也春風暢之時雨霖之心乎愛矣何以祝之朝廷豈不  
念下民之鬱陶乎奚其爲奪我君而不省留也詩曰愷悌  
君子神所愛矣庶幾乎三珍依憑百祥臻降云爾乃購奇  
匠倣靈峯追琢鏡光鑱鑿電燦倚高壁臨懸關蹈石芍戴  
珉鬢縹緲雲聳嬋娟玉立模宰官之形儀現輪王之相好  
諦視瞻仰將莞爾而微笑攝心傾聽疑僊然而有聲其左

右則福地園林香城基址前佛後佛大身小身亘岑嶺而相望遍虛空而無數此身不動觀大地之衆生彼佛何來見河沙之世界爾其北對宮觀南馳荆越闕路開豁而中斷伊水逶迤而長注修途交會車馬川流帝城風俗是焉游覽如鎮南之峴山似關西之灞岸暮春桃李上巳清明汎法池之綠波憑靜域之丹檻揚袂陰景躡步震山花散四天香聞八國以不居之歲月閱無窮之人代知妙容之常在覩永劫之因緣盛德相傳與此山而終始不其偉歟昔孔子化中都以攝魯相卓茂理千密以致漢治夫樹善

有基建功無小蘇君春秋鼎盛德業日新方欲驤首天池  
整翮雲漢致大君於堯舜紹層構於韋平是宰也故以五  
路之推輪九域之覆簣已重宣此義而說偈曰

大哉元聖心如明鏡深入禪定龍飛清淨觀我佛性靈相  
珍飾精窮妙極於崑之側因空見色登我願力不競不綖  
不剛不柔敷政優優百祿是適侑我蘇侯

荅宰臣賀破賊制

省表具知蠶茲戎狄侵軼邊鄙不交鋒刃自取敗亡旣邊  
將之功亦天道所棄心之有慰與卿同之

試洛州進士策問四道

問有征無戰道存制禦之機惡殺好生化含亭育之理頃  
塞垣夕版戰士晨炊猶復城邑河源北門未啟樵蘇海畔  
東郊不開方議驅長轂而登隴建高旗而指塞天聲一振  
相帛俱焚夫春雪侵陽寒蓬易卷今欲先驅誘諭暫頓兵  
刑書箭而下蕃臣吹笳而還虜騎眷言籌畫茲理何從  
問夫子述孝經裁道德輔天相地樹之王化穆乎人倫旣  
鈞命而合謨亦契神而盡性厯聽藏書同爲代寶永言五  
孝不列六經將設教之有旨豈偏序之無法北宮羣彥未



始詳焉東觀諸儒不之辯也且禮樂二本古文漏失春秋  
三傳大議派分而備六籍於蘭臺懸九經於甲令今欲登  
孝道爲七藝抑未前聞足經名爲十部恐疑後進思觀義  
窟用定儒門

問語人以倫鳴鶴斯和砥名礪節異代同歸子等溫古知  
今將施有政前言往行豈曰無聞至於顯仁義以基德標  
智信以習禮觸目青史比肩縹帙思齊其事各辯其人旣  
呈役於扣鐘可徵賢於求燧肖形天地甄化陰陽五常配  
於五行六情同於六氣爲所稟之各異蓋因物而或遷仍

分情氣之題目兼敘常行之方位

問自昔帝王必有制作所以隆基天命器辯神姦至如或  
鑄昆吾或遷邾鄆虞邱之說尚疑周漢楚子之問未詳輕  
重通明舊史幸爲指陳亦有弗父勒銘仲山傳器得於何  
代顯自何功魚遊之旨安施雉頌之文奚戒兼言鼎鼎之  
異及顯家國之宜

兵部試將門子弟策問三道

問禮樂詩書將之本也德刑政事戰之資也自營州東覆  
趙郡南侵踐更塞下望獵塵而股戰擁麾隴上聞虛弦而

心死中興皇厯大講戎機懸金待賞築壇思拜吾子才標  
美箭門襲良弓軍法盈懷兵規指掌未知獻何道使人興  
義進何政使人知禮施何方使人向信行何術使人有勇  
擇前王之令典合今日之權宜助武成於七德翼威加於  
四海又聞乎兵以正合戰以奇勝然則守信非乎尚詐成  
列異乎鼓儼去就之宜佇詳厥旨

問良將者必精辯天時審詳人事兵家舊畧遺訓存焉借  
如歲在豕韋日交析木漢軍北戍胡騎南飛守則覩於星  
高戰則逢於陰盡何方以得天道何策以決時機應積沈

金史卷之三  
卷之三  
謀勿參浮說且鬪由角力克在同心而子野歌風遙知不  
競亞夫望氣懸識將興豈雲物非繫于人或成敗不關於  
戰幸陳晉楚之術以定天人之理

問輕齎遠襲取敵人爲資敵人固守不我斯應疑圍則師  
老而力屈去則糧盡而途遙何策可以下城何謀可以召  
戰又兩軍相遇同阻一水必資其畧以致敵來傾俟良圖  
抗行前志

兵部試沈謀秘算舉人策問三道

問詩稱有截傳載無爲必在其人方致斯道皇上心存元

默政洽清虛坐五室以調氣舞兩階以柔遠溥天之下計  
日來庭尚有戎羯餘塵覲長城於塞北句驪舊壤走都護  
於安東棄招蹙國之譏取有疲人之患綏討之理用捨何  
從且夷狄異方地俗殊等借是斷山川之是利較戰守之  
所長贏糧調兵幾何克濟選倫求將可者爲誰靜聽嘉謀  
將聞執事

問安西迴途磧北多寇自開四鎮於茲十年及瓜戍人白  
首無代分閫節使丹旄方歸未悟恢邊之益且疑事遠之  
弊今赤曷旣并於黃姓默啜復覘於庭州漢掖徒張胡臂

金定台曆子 卷二十二  
未斷而內匱積穀外非足兵於何出踐更之師奚使閒穹  
廬之黨息人靜國有策存乎

問五嶺山深三蜀地險篁竹之下時驚剽劫瓜芋之壤歲  
擾居人若縱兵揚麾則烏散谿谷及旋師反旆則蟻聚津  
途窮之乃一切歸降置之又無不反覆安輯之術敷陳其  
要

### 諫內宴至夜表

臣聞上天示下災祥將以誘導人主先王仰觀休咎亦以  
順修政教易曰天垂象聖人則之言天人之際感通必矣

臣伏見去年十月十七日月滿猶望應虧不虧今月十七日亦未少虧此易常之異也夫月者至陰之氣臣下之象當助天作明順時盈缺若過盛逾時盈縮乖度得非臣下之咎而上天之誠耶伏願陛下深察熟思而預防之臣又見近日內宴夜深方罷小臣無識抑所未安王在在鎬凱樂飲酒此誠大雅之美也臣卜其晝未卜其夜此蓋春秋之義也伏願陛下宴樂之餘不及於夜臣職忝補闕昧死陳愚謹言

并州論邊事表

臣說言臣說頓首死罪死罪言臣聞小忿不忍延起大患  
小罪不寬迫成大禍契丹奚背恩誠負天地不容之責然  
原其狀本是夷戎君臣不和自相誅戮耳所望聖慈且使  
其族類在朝者將勅書再三告讓因其所欲立酋長而便  
定之或可不戰而定也必告之不馴則大發兵馬東召靺  
羯西舉九姓來春未青數道齊入突干之首可拾而取未  
爲晚也天恩若不忍以中國勞事蠻夷則嚴兵備塞棄兩  
蕃如糞土耳又許欽浹擁二萬餘衆據五丈之城有糧即  
守不可拔無糧即鼓而行歸何所慮也今遣史獻非時遠



抄近掠其實甚難萬一未捷賊氣轉壯下臣愚昧不敢隱情伏願聖恩再加裁度臣說誠惶誠恐頓首頓首

爲留守奏慶山醴泉表

臣某言臣聞至德洞微天鑒不遠休徵祕景時和則見是知縣代曠厯慶牒祥經帝王有必感之符神靈無虛應之瑞伏惟天冊金輪聖神皇帝陛下金鏡御天璿衡考政欽若元象宏濟蒼氓茂功將大造混成純化與陽和俱扇朝百神之樂職宅萬國之懽心嘉氣內充淫雨外息豈止搖風紀月之草列蒔於階除儀簫銜籙之禽相鳴於戶閣而

已固有發禎厚載抽貺泉源表元德之潛通顯黃祇之昭  
報臣於六月二十五日得所部萬年縣令鄭國忠狀稱去  
六月十四日縣界霸陵鄉有慶山見醴泉出臣謹差戶曹  
參軍孫履直對山中百姓檢問得狀其山平地湧拔周迴  
數里列置三峰齊高百仞山見之日天青無雲異雷雨之  
遷徙非崖岸之騫震歛爾隆崇巍然蔚鬱阡陌如舊草樹  
不移驗益地之祥圖知太乙之靈化山南又有醴泉三道  
引注三池分流接潤連山對浦各深丈餘廣數百步味色  
甘潔特異常泉比仙漿於軒后均愈疾於漢代臣按孫氏

瑞應圖曰慶山者德茂則生臣又按白武通曰醴泉者義泉也可以養老常出京師禮斗威儀曰人君乘土而王其政太平則醴泉湧潛潭巴曰君臣和德道度協中則醴泉出臣竊以五行推之六月土王神在未母之象也土爲宮君之義也水爲智土爲信水伏於土臣之道也水相於金子之佐也今土以月王而高水從土制而靜天意若曰母王君尊良臣善相仁化致理德茂時平之應也臣又以山爲鎮國水實利人縣有萬年之名山得三仙之類此蓋金輿景福寶祚昌圖邦固不移之基君永無疆之壽自永昌

之後迄於茲辰地寶屢昇神山再聳未若連巖結慶並泌  
疏甘羣瑞同區二美齊舉高視古今曾無擬議信可以紀  
元立號薦廟登郊彰賁億齡愉衍萬宇臣辱司京尹忝寄  
留臺牧西夏之疲人荷東蕃之餘寵游泳鴻露震悚明神  
禧祉有歸光啟茲部喜覩殊觀實百恒流踊躍一隅馳誠  
雙闕伏請宣付史館頒示朝廷無任鳧藻之至謹遣某官  
繪圖奉進

爲留守奏瑞禾杏表

臣聞天微地杳惟聖能通物寶靈禧在德斯感伏惟天冊

金輪聖神皇帝陛下覆翼萬方植生羣類化行至道風流  
太和白耀青光目日月之瑞赤文元甲手河洛之符旣慶  
溢於山泉又嘉賁於草木臣今月三日得所部萬年縣令  
鄭國忠狀言縣界內霸陵鄉新出慶山南之醴泉北岸有  
瑞杏三樹再葉重花嘉禾三本同莖合穗臣謹差司兵參  
軍鄭味元檢覆皆實臣謹按孫柔之瑞應圖曰嘉禾者五  
穀之長也王者德茂則生昔炎帝教洽人心而嘉禾秀周  
公理合天道而嘉禾豐臣又以事可理推物有類驗蜀桑  
異葉李定知其有祥漢木奇枝終軍以爲無外今植物搖

落而瑞杏繁滋所謂仁育之風行於肅殺之序此蓋聖道  
隆渥靈祚宏多朱萼素花彰孝理於詩傳一莖九穎合德  
耀於祥經曠代殊珍崇朝累集方俟山流石髓杏茂仙林  
醴挹軒漿禾登堯膳受天介福錫帝長齡觀王母於崑臺  
朝神人於谷口今綠苗尚撓黃粒未成當須晚秋不獲早  
獻臣忝尹茲部頻矚洪休抃躍之誠倍萬常品

爲留守作賀嶠山表

臣聞山川變見如來有得道之祥國土遠移至人任不思  
之力伏惟皇帝陛下宏惠福深勤人願滿蓮花授記應上

聖之降生貝葉開圖握大雄之寶命司戶參軍孫履直伏  
承臣奏所部萬年縣新出慶山醴泉乃有天竺真僧於春  
首獻狀若以梵音所記此是祇闍山恒河沙佛必經林下  
虛空衆聖常處巖閒隱見外方湧秀中土岑泉可識體類  
宛然感應十號之尊示見千輪之主此實天威無礙地寶  
有歸化焜燿於裁成理窈冥於言說但瞻三山丹壁奄靈  
驚而飛來三泉淥池逐神龍而吐沃峰高八百協周室之  
隆基地得萬年祈皇靈之資始儒書分載望偈希聞加以  
堅固開林吉祥被草重花瑞杏藻岫紅源九穎嘉禾慈巒

黛壑原臨白鹿識鹿苑之仙游路邇朱城悟王城之鍾聽  
方俟迴輿雪嶺厭香積於羣臣沈璧天池蔭靈枝於下國  
吹法螺而朝玉帛乘瑞象而會天人溢宇流觀殊鄰浹慶  
臣守符京郡奉神嶽於郊畿係葉皇柯仰慈雲於雨露喜  
抃之極倍百恒誠

爲留守奏羊乳麝表

臣某言臣聞靈感無方每先時以見象神鑑不昧必憑物  
以示人有德著而休歸或祥來而事應伏惟天冊金輪聖  
神皇帝陛下端冕馭天舞干柔遠南越瑞貢久通驛而歸



仁西域奇山近隨方而應聖臣今日得所部萬年縣令鄭  
國忠狀送新出慶山下殺牝羊乳麀麀一頭狎擾因依動  
息隨戀如從所產若素同羣理有可嘉事無前例竊以異  
類相育外方慕化之徵野畜自馴荒服來王之兆必有遠  
夷解辦歡心百獸之庭獷俗懷音稽顙三朝之會臣言可  
驗翹足是期昔馬或生羊易占得人安之體犬時養彘天  
鏡顯代康之文援此比蹤實爲同貫況復晨飲醴浦夕下  
靈山翳仙杏之奇花拾嘉禾之餘穗羊禎甚玉麀慶如銀  
晦朔未移祥符累集福應之盛前古未聞臣忝尹京都屢

薦嘉瑞抃躍之至兼倍恒流謹差某官奉表隨進

爲留守奏嘉禾表

臣某言臣聞天聽自人神和在德代非乏瑞罕遇開泰之期福不虛徵必俟休明之主伏惟天冊金輪聖神皇帝陛下仁覆萬靈孝理四海功莫高於尊祖道莫大於配天嚴備郊禋崇肅宗祀秩百王之禮兼六代之樂恩溢膠庠訓優更老政每光於帝籍役不紊於農時嘉氣橫游祥風紛灑騰文煒色九光連合於貞明逸輩殊倫百寶駢滋於動植臣今日日奉進止告望鳳臺慶山醴泉之瑞其日於山

陵東柏城內得嘉禾一本臣初見衆苗亘壟香穎垂秋嘉  
翫繁滋欲觀稃粒左右無識折以呈臣異其綠葉綬舒蔥  
芒璧秀熟視奇狀乃知嘉祥下則異畝合莖上又同連雙  
穗昔雍熙之代政理之君雖導出應時而生不擇地未有  
託根神域彰孝德之能深吐秀壽宮助粢盛之豐潔此蓋  
睿誠通感靈佑降祥中古以來未睹斯美臣籍慶宗枝久  
沐星潢之潤躬持瑞穎預奉天保之符抃悅之誠倍兼恒  
品

爲清邊道大總管建安王奏失利表

臣攸宜言今日某乙從峽石山稱前軍王孝傑等以某日  
失利於峽石山忽聞殞絕心摧魂死上孤天威下慙士卒  
死罪死罪頓首頓首臣以駑怯謬職戎麾銜戴恩榮統率  
將士驅關隴之馬引淮海之餉旗幕亘於邊城弓甲傾於  
內府不堪任使撓失節度羣帥無決勝之功偏師有挫衄  
之咎長犬羊之孔熾縱梟獍之未滅憤結靈祇怨毒骨髓  
臣實其罪罪非他人忍恥苟全遠愧胡顏之責引慝遄死  
內負猶鬪之心踧踖無顏進退靡處臣既不建師律有干  
常憲合即嚴科以塞重責然以見在兵馬交要部統未敢

束手軍事委置旌節稽緩刑書伏深兢戰特乞更召嚴猛  
代臣統帥請歸罪司寇以正國刑囚伏邊陲唯待斧鉞

讓起復黃門侍郎第一表

草土臣說言臣私門凶咎喪紀未終不自毀滅苟存聖代  
忽降制書復臣工部侍郎尋奉後命授臣黃門侍郎震驚  
失圖哀悌隕絕臣說誠惶誠恐頓首頓首死罪死罪臣弱  
年早孤母氏訓立得紹基構忝列簪裾從宦歷年晨昏多  
闕播遷遠裔離別又苦顧復無荅報養何追心所摧感語  
不能喻甫至冬中禮及祥禫今已春暮瞻言幾何是臣事

朝廷日長戀几筵日短乞寢嚴命許達私情訴衷祈天所  
望矜遂無任荒迫之至謹詣朝堂路左奉表乞哀以聞謹  
言

第二表

草土臣說言臣在疚承榮布哀陳款精誠無感天睠未迴  
假喘殘生悲懼轉集臣說誠惶誠恐頓首頓首死罪死罪  
臣聞苦者不覺聲哀窮者貴其言達情有至切辭無敢隱  
臣爲少子慈愛所鍾每一離別輒加憂憫況臣生年多故  
違隔私庭終堂之日身限公事存旣數違左右沒復不畢

几筵痛心自傷特殊人類臣今望延數月企及再期乞恩  
無多報國非晚冒死重請冀蒙哀遂無任懇迫之至謹詣  
朝堂路左奉表陳乞以聞

### 第三表

草土臣說言臣荒喘窮情再瀆旒屨懇誠不到未感天心  
誓將冒死祈恩分外中謝臣本書生門非代祿數葉單緒  
族無親房臣父遭憂曾祖未葬臣有兩兄一妹甥姪九人  
又有中表相依向成百口吉凶衣食待臣以辦臣今拜職  
黃閣侍奉丹墀厚祿清班一朝改官舉族榮賴爲幸過甚

人情所欲豈合稽恩正以熒熒苦心有所未盡臣亡母在  
日朝夕誠臣以臣獨立無徒好直多忤知子者母果驗所  
言往罹大獄竄命炎海晨出晚歸貽慮非一沉涉危難傷  
心幾途追憶生平倍增摧慕侍養日少遠離日多即臣母  
憂臣以終身臣其忍服縗以從事情既不同常例望在特  
降殊恩臣先患風緩近加虛痺陛下倘從臣數月容過再  
期非但寬其哀疚固亦全其生理亡身報國庶竭後圖木  
植有性枉之則折人願在心違之則苦雖強爲用將何以  
堪銜泣仰天冀蒙哀允無任懇迫之至謹詣朝堂路左奉



表陳乞以聞

讓兵部尚書平章事表

臣說言伏奉九月十九日制書到并州授臣兵部尚書同中書門下三品王人在門驛騎首路奉恩循分以慙以惕臣說中謝臣早以書生射策載筆聖朝晚以軍誌典兵秉旄乘塞祿非援進寵是宸衷久侍玉階四掌綸誥一心好直三黜其宜今復用之猶夫人也何足以舉明邦政光緝帝猷更策疲驂來塵法駕又臣已受命司籍專意簡書所希散冗因閒就業忽叨劇職責大憂深人心有限事難兩

濟國史無成臣執其罪上思薦賢以自代下願守分以全  
節竊見開府宋璟清介獨立倚法不回詹事陸象先清明  
向道臨事能斷其高明有素歷朝之所仗委其積行無疵  
衆人之所體信揆停往任未盡宿誠乞迴此恩以納來効  
必能補舊政之缺漏廣前途之軌轍雖探心角力臣頗與  
二子齊驅然校德考年彼皆有一日之長天下者累聖之  
公器宰相者萬方之具瞻臣所以廷讓彰言不陳密啟伏  
願聖恩聽與而舉俾諧僉囑儻朝任得人實海內幸甚無  
任力微任重惶懼之至謹奉表陳讓二年十月十七日

讓中書侍郎表

臣說言伏奉制書除臣中書侍郎寵命俯臨驚魂自失臣說中謝臣聞雲構鬱起非枳棘之任天波暴集寧溝澮所容臣識無通方文不經國南宮華省已忝前行西垣內閣將陪近侍心慚官謗跡愧時流何以承掌王言贊決機務當今二儀再造百度皆新太平之基惟賢是與渾成庶政責在中書豈以常才敢膺首選乞寢恩命改擇時髦惟慎庶官以諧僉議無任悃款之至謹詣朝堂奉表陳讓以聞臣所讓人別狀封進

讓右丞相表

臣說言伏奉制書除臣右丞相兼中書令臣學慚稽古早侍春宮階緣舊恩忝竊樞近雖思致君堯舜而才謝伊臯今屬升中大封方求俊乂猥升端右實愧朝行乞停新令獲守舊職辭訥情懇希垂察諒無任屏營之至謹奉表陳讓以聞

第二表

臣說言伏奉今月十日制書除臣尚書右丞相恩命自天戰跼無地臣說中謝臣少長儒門墾鑿墳史才非高格官

不因人徒以命偶龍興位階鴻漸五入西掖七踐南宮中  
閒拙延謫放直招玷缺傷矢之禽聞弦虛墜賜環之客聽  
歌先泣此則魂爲危感氣由懼奪安可重收廢器再辱端  
揆何以師長禮闈正持憲府當今典章革故風教鼎新野  
無四隱朝有三傑具瞻之地願擇時髦臣幸沐遺簪墜履  
之恩好生養志之德朝遊簡牘暮對圖書受賜無涯循榮  
過分豈更干處士之橫議招匈奴之遙哂艾骨自瘡負乘  
致寇雖則愚情懷戀覲冒求寵亦望聖慈限約今度餘年  
願停今授長守舊史罄陳肝膽非敢飾讓謹詣朝堂奉表

自乞臣說誠惶誠恐頓首頓首死罪死罪謹言

讓平章事表

臣說言臣伏奉宣旨制書以臣同中書門下平章事承命  
戰汗拜舞失容臣說誠惶誠恐頓首頓首死罪死罪臣本  
書生器識凡近仕不望於通貴祿只期於代耕蒙時寵榮  
越踐臺閣局心守職竊所庶幾長筭經邦則無逮及伏以  
廟堂寄切軍國務殷循涯審分非臣攸處爲國者爲官擇  
人爲臣者陳力就列若智小謀大力微任重豈敢顧惜微  
軀實恐上塵王政是以披露肝膽不暇飾詞乞停此授俯

遂誠請無任怖懼慚惶之至謹詣朝堂奉表陳讓以聞

讓中書令表

臣說言伏奉今月十一日制授臣中書令恩渥自天震越無地臣說中謝伏惟陛下至孝安親大功定國六合翹首庶政惟新雍熙之化望在茲日中書理本臣叨首名將何以翊贊聖君光澤天下自臣攝官禁掖已涉七旬不知賢才以舉是不仁也不辨不肖以退是無勇也何足以備乎宰臣胡顏冒恩復受真拜臣之愚執正在於此不敢繁辭以塵聖聽乞迴榮授改擇時髦無任懇款之至謹詣朝堂

奉表陳讓以聞臣所讓人別狀封進